

春峯詩稿

特 259

211

0 1 2 3 4 5 6 7 8 9 10 11 12 13 14 15

始



第 259  
211



春峯詩稿

板倉中著



春峯詩稿序

余聞春峯板倉君之名者五十年。知其慷慨憂國。任俠好義。而未至面晤也。曩歲同人荆龍一吟社。君亦來參。始得相識。君狀貌魁梧。動止有則。一見覺其超出凡衆。而所作詩。則平易淡泊。絕無矜奇標異之迹。余心私怪焉。蓋君通東西之學。諒直自守。其壯也有感時勢。攘臂而起。好論政事。踔厲風發。聳動一世。又數中代議士之選。常爲黨人所重。夫以君名望地位。自作身圖。則升列臺閣。勳業炳耀。如拾芥耳。而一旦棄歸江湖。開執中塾。聚徒教授。詩酒自娛。何其襟懷恬淡也。余嘗訪君於城西寓居。一室之中。圖書雜陳。庭前竹樹。蒼翠成陰。君日夕嘯詠於其間。如不復與

世相關者。乃知除圭角而就寬厚。息躁進而歸寧靜。詩亦隨境而變爾。頃者君持平生詩稿來。屬余刪定。總三百數十首。自感觸遭遇。以至游覽應酬。大抵直敘實際。不加雕飾。亦足以見其人品矣。君夙業狀師。今年踰七十。猶未廢也。及其上法術。爲人爭曲直。則厲聲揚眉。不能自己云。

昭和七年壬申三月

東京 岡崎壯撰

目次

池塘晚望

月下聞蟲

秋雨懷鄉

丁丑秋至東京海上作

千葉寓居

丁丑十二月十一日偶爲警官吏所疑拘留五日有作

同其二

戊寅元旦試毫

到南總途上過野田原

哭河野氏

發千町村留別從兄河野氏

咏松竹梅

明法學舎口占

墨堤觀花

同前

東臺賞花

同其二

贈猿屋町田邊校主

兩夜

不忍池畔所見

巳卯晚春

明治十四年十月搭汽船發東京泝刀水

同年省祖母

於養安寺村觀月

庚寅新年作

獄中作

獄中讀書

獄裏晚春

四月念一日呻吟得古調

偶感

到八日市場途上

失題

示敵將大須賀六軒  
次乃木將軍蓋平城外詩  
和石田湖南之中秋對月  
明治廿九年二月川村雨谷翁畫會席上  
同三月於川村翁畫會席上  
丁酉三月小金井賞花  
登戶海爲隣樓矚目  
戊戌四月於樂賓館  
病中和大須賀六軒  
遊巖島  
和高山樗陰

讀書  
千葉街失火  
長胤寺觀梅  
戊子三月自浪華歸途於遠州洋  
巳亥至千葉  
題群駒遊戲圖  
巳亥八月訪中村吞舟  
庚子元旦  
大須賀六軒見示新年詩次韻  
富岳日出圖  
和存軒渡邊氏詩

疊韻六軒詞兄詩

送巖谷小波游獨乙

瀧野川觀楓

和伊東晨亭詩

謝某政客勸誘

汽車中次遠山詞兄詩

成東驛別遠山兄

辛丑新年書懷

辛丑江木氏待我歸軒

至鬼首途上

弔高旗城趾

宿轟溫泉

題漁翁圖

辛丑九月雨中作

於那古山上

於和泉式部母子之墓

千葉途上謁秦山伯有作

贈廣岡松堂

鹿野山中作

樂賓館即事

代南山和楞陰離別詩

和六軒詞兄

同前

辛丑十二月和石田湖南

同和伊東暘谷

偶感

呈大山元帥

戊申五月書感

同

北越客中

謁春畝公樞

庚戌五月送別宴席上

瑞西山水

剃長髯

庚戌五月探姑蘇城勝

和小川射山香港之詩

六月彼南所見

六月觀釋迦講法遺跡

於船中

辛亥八月浴山中溫泉

壬子三月於山城街

和佐藤山外見真大師詩韻

奉梓宮至青山

壬子九月

觀仙臺垂枝櫻



贈外山義達翁

和硯海詞兄送夢舟

勿來關述懷

賀恒松君華甲

次江木冷灰詩

再次江木冷灰自畫蛙圖

乙卯被訴追自嘲

同六月獄中之詩

徙高松獄

獄中口占

石田湖南寄書於獄中次余詩却求和乃疊韻

獄中偶感

丙辰新年試毫

和石田湖南詩

丙辰四月游東臺

和石田湖南疊韻

和井上活泉詩

次奧村正雄辭世詩

海邊松

登別溫泉卽事

板倉公平君一週年祭

朝晴雪

戊午歲晚書感

田家早梅

答板倉龜水疊韻

和武市蒼軒見寄

題香取鄉文墨士紀事

庚申四月次武市蒼軒詩

蒼軒再步前韻乃疊韻

庚申四月蒼軒臥病

故友峰信一寄詩即次韻

鹽原觀紅葉

宿楓川樓

至鹽湯溫泉宿玉家

畑下戶清琴樓

同前

上妙義山

庚申十一月高尾看楓

辛酉八月游千島途上

根室港邂逅小林栗村

於滿里山頭

答人問近狀

自木更津至千葉途上

於太田

過勿來關趾

旭光照波

幽居

謝石田湖南贈鯉魚

展大井馬城先生墓

望思蘇長公賦

綠陰讀書

同其二

觀蓮

次伊東陽谷詩

送關口子赴任仙臺

癸亥九月一日東京大震火災書感

疊韻

次大八木文村弔平野行樂七回忌詩韻

輓河野岩五郎君

新年言志

對落花

栽竹

同右

星享氏廿四回忌

次山本二峯詩

栽竹

江岸寺老松

熱鹽溫泉雜詠 六首

展玄翁和尚墓

過白河關趾

蘇東坡

晚酌

次平野順天子蓬島偶成

謝本橋君贈松輩

山色連天 二首

次皆川君除夕韻

寄水野香堂次其山色連天詩

喜小川射山入臺閣

春郊散步

詠牛

初夏偶感

躑躅花

插秧

初夏所見

次堀內靜字將遊九州留別詩韻 三首

聽蟲

鴻臺懷古

落葉

初冬夜坐

曝背

寄古劍遺懷

河水清

探梅 二首

詠史(信長)

同 (氏鄉)

雪霽 二首

題林和靖觀梅圖

春山讀書

新燕

題金華石

次若槻相公周甲詩韻

壽國分青厓先生古稀

春草

壽克堂首相華甲

讀屈原傳

杜鵑

賀中村國手舉男兒初遇端陽佳節

題李白觀瀑圖

同右

盆魚

登嶽

題背面美人圖

步克堂相公飲席上詩 三首

次蔗庵總督書感詩

送蔗庵總督赴任臺灣

迎靜宇堀內君自九州歸

秋夜書懷

紫式部

和蔗庵總督見寄詩

觀菊

鎌倉懷古

送青厓先生遊臺灣

贈鵜澤兄

寄懷青厓先生在臺灣

海上風靜

冬暖

海上風靜

迎青厓先生還自臺灣有作

瓶梅

題清女撥簾圖

大正天皇輓詞

東台觀花

送友人之支那

夏景冲澹偶然作

梅雨

和鶚軒土井君退官所感韻二首

消夏雜詠

題不識庵擊機山圖

觀瀑

題畫

殘菊

冬夜寄友

歲晚書懷

新年書事

畫龍

訪梅

挽堀內靜宇

新筍

讀嚴子陵傳

詠史(德川西山公)

遊玉川

七夕

曝書

驚秋

落葉

新霜

拜登極大典恭賦

田家朝

泉岳寺

消寒雜詠

新鶯

聞盜匿堀口長城邸贈賦

桃源圖

同

菜花

同

蛙聲

訪真鳳上人病

虞美人

虞美人草

喜夏

答人問近況

弔宮井思堂

新涼

王昭君

饑秋



題萬里長城圖

新寒

海邊巖

富嶽旭日圖

春雪

遊房州

寄若槻克堂奉使在倫敦

送人遊芳野

次金子溪水天長節詩韻

步綱陵德川侯爵帝都復興玉礎

畫蘭

初夏江村

詠芭蕉

同二

同三

題竹林七賢圖

次奧村梅村金婚自述韻三首

秋蟬

秋懷二首

掃落葉

送本田春城之北海道

冬至感懷

社頭雪

題蘇武牧羊圖

紅梅

同

春夜聽雨

辛未四月次若槻克堂就任口占之韻

聞湯目北水病起賦贈

春晚

川上南洞翁七十壽

平清盛

謝人贈香魚

題首尾松材蓂盆

靜女

夏夜坐月

歸燕

僧西行

十六嶋暮秋

昭和七年壬申御題 曉鷄聲

寄人在滿洲

題書齋樂貧居

昭和八年御題 朝海

園田天籟君華甲壽詞

梅花

函山

皇軍破敵入熱河

以上三百三十七首

春峯詩稿

春峯 板倉 中著

池塘晚望

翠柳搖風野水邊。半輪新月照清漣。村童何處吹長笛。和得蛙鳴斷復連。

月下聞蟲

書窓無客共清談。月上前峯照碧潭。半夜吟蛩聲不斷。滿庭秋氣十分酣。

秋雨懷鄉

征衣未寄冷西風。滿目關山積雨中。獨倚欄干懷舊里。東天雲暗晚濛濛。

丁丑秋至東京海上作

幾群鳧鴨戲西東。一片白雲浮大空。波靜人如坐牀上。山縈船似在池中。

千葉寓居丁丑九月

月白他鄉夕。風清落葉秋。夜窓人不到。孤客暗生愁。

丁丑十二月十一日偶爲警官吏所疑拘留五日

有作

風敲戶外難成睡。雨入窓間忽起愁。莫道人生多鬱屈。心存正理自悠悠。

其二

英氣平生欲壓人。從來臨事輒忘身。如今遇此些些厄。却喜精神發得新。

戊寅元旦試毫

回首既往事多非。醉裏詩成筆一揮。新雨新來濡舊砌。舊軀依舊着新衣。

戊寅一月九日到南總途上過野田原

薄暮荒原凜北風。寒雲遮路錯西東。領巾帽子纔包面。健步紛紛凍雨中。

哭河野氏(權左衛門中伯母夫也)

寒林寂寞鳥空鳴。菊折楓殘不耐情。歎息故園人已沒。空

山墓上白雲橫

戊寅一月十二日發千町村留別從兄河野氏

難期司馬駟車榮。自許阿蒙刮目名。別後相懷欲相問。託他明月寄真情。

咏松竹梅

君子平生氣味親。歲寒時節特看真。貞堅瀟灑將幽艷。不屈嚴霜不受塵。

明法學舍口占

身迹何時得晏如。風奔露宿遠鄉閭。胸中猶蓄憂時志。机上常繙經國書。雲片朝朝來又歇。月明夜夜滿還虛。寒燈一穗幽窓下。夢繞南總舊草蘆。

墨堤觀花

細雨稍晴和氣薰。墨陀堤上漲塵氣。一川碧水春風暖。十里芳雲夕日曛。肥馬鞭霞飄雪萼。蘭舟截浪亂花紋。紅樓傳燭清歌起。月下飛來白鷺群。

又

士女成群自在游。落花繚亂水悠悠。春風吹過長隄上。一簇芳雲擁畫樓。

東台賞花

春樹高低帶彩霞。櫻花深處一徑斜。吟囊已滿新詩句。忽認青帘向酒家。

又

王孫花下酒千巵。公子車中伴麗容。却好孤筇乘興去。隔林閒聽夕陽鐘。

贈猿屋町田邊校主

聖代恩波及狹斜。猿街路畔鬪文華。主人元是風流客。手灌清泉護衆花。

不忍池畔所見

戊寅五月

掩池蓮葉傍池家。翠柳陰中一路斜。騷客空憐杜鵑叫。薰風搖蕩紫陽花。

雨夜

戊寅六月十六日

風雨聲喧戶牖前。愁人半夜不成眠。况遭蚊蚤頻來犯。燈下懷鄉獨悄然。

巳卯晚春

螢雪孜孜已幾年。清貧漫自擬前賢。落花風裏春將老。窓下蕭然背月眠。

明治十四年十月二十三日拂曉搭汽船發東京

泝刀水

汽笛聲中發洛城。西風兩岸水波清。筑波青黛芙蓉雪。共向秋天弄曉晴。

明治十四年省祖母

古樹荒園傍水流。慇懃迎吾慰羈愁。休言草屋傾斜甚。却勝都門煉瓦樓。

歸路宿於養安寺村田中氏半夜出門觀月

十里金風吹敗荷。一輪明月照清波。微吟歸去荒園裏。添得秋思分外多。

庚寅新年作

曉登高閣舉椒杯。瑞氣氤氳萬里開。遠近煙埋瀨水柳。高低雪點滂涯梅。帆檣靜列海灣裏。車馬喧奔城路隈。騷客獨歎忙歲月。東風又是促春來。

獄中作

忘却獄窓投此身。春眠枕上不知晨。疎狂如許也堪笑。被害反成加害人。

獄中讀書

獄窓風度雨痕斑。自有春光足慰顏。花落花開多事際。天

公賜我讀書閒

獄裏晚春

獄窓中夜夢雄飛。戶外燈光一點微。殘月入雲風淅淅。落花委地雨霏霏。杜鵑悲叫催愁去。旅雁哀鳴告別歸。煙霧一從籠羨里。三春光景總皆非。

四月念一日夜感慨滿胸不能眠呻吟遂得古調一篇

猪鼻之月袖浦烟。形影相隨十八年。單筇朝穿綠樹裏。孤棹夕向斜陽前。端艇酒載盛夏日。江樓歌罩暮秋天。或繙經史追先哲。或揮筆舌挫狡譎。嘗慕曾閔事慈親。又期房杜効帝闕。怒濤屢冒難波津。聊酬知己盡精神。生際聖明

立憲世。雄心奮發存此民。小則縣政大則國。駑鈍猶自欲  
致身。花多風雨士多阨。况有陋俗弊似疫。桀犬吠堯自古  
然。蠶蠅何曾辨黑白。輕車偶過東海濱。暴颺吹沙塵萬尺  
落英狼藉福岡西。墜下忽學羗里跡。憶起壯烈文天祥。正  
氣歌篇感慨長。休說事業多蹉躓。窮通由來付彼蒼。半生  
辛酸何所就。淬礪唯有金鐵腸。驚回花月豪遊夢。忽焉三  
十五星霜。

偶感 四月十日夜作

孤雁叫飛如失時。落花繚亂似含悲。不圖政海縱橫手。獄  
裏朝昏削小詩。  
偏惜人間歲月流。雁歸花散惹幽愁。鐵牕三尺離離草。風

露滿庭淒似秋。

明治廿六年四月十七日到八日市場途上

雨餘春色水西東。得意桃櫻映眼紅。一路香風吹不絕。輕  
車送夢落花中。  
細雨河邊水接空。客衣春冷落花風。流鶯亂囀無人聽。遠  
寺鐘聲杳靄中。

失題

事業蹉跎過半世。空懷大志背清明。疎狂自笑不容世。枉  
對簡編期老成。

明治廿七年選舉時示敵將大須賀六軒

城樓人去月三更。征客憑欄無限情。千里懸軍今似箇。慵



聞四面楚歌聲。

次乃木將軍蓋平城外卽事韻

一掃冥濛塞上紛。遠征功遂却消魂。蓋平城外斑斑雪。借問東風過幾村。

去年九月石田湖南寄中秋對月一篇求余和余俗事匆忙未果今茲乙未元旦手椒杯高誦和之即却寄乞正

飄零又迎王正月。時運何問盈與缺。我生暖飽亦天恩。放浪自甘無功爵。新霜驚白數莖髮。豪懷欲冲斗牛闕。如今風雲頻起人。壯心豈耐臥巖窟。聞說勃海之濱堆白骨。長城之下驅萬卒。昨夜夢回四百州。寶刀拭來氣鬱勃。休論

武備及文章。男兒盡國須憤發。遮莫世間少知己。行路有難感曷竭。

明治廿九年二月九日川村雨谷翁畫會席上作

小集東台麓。詩酒壓春寒。潑墨霜牋上。群芳自在看。

三月十五日川村雨谷翁畫會席上

溪間點綴兩三家。山雨催來惜落花。翰墨因緣時會客。春風席上走龍蛇。

丁酉四月念三日同二三子小金井賞花

携酒還爲野外遊。春風一路意悠悠。此間真趣無人識。萬點櫻花點水流。

登戶海爲隣樓囑目

花園柳繞兩三家。一帶青山帶淡霞。坐見玻璃窗外景。白帆行處夕陽斜。

戊戌四月初宿樂賓館戲賦似天遊

東風送雨入闌干。旅館更深燭影殘。何厭梅花狼籍甚。一枝贏得護春寒。  
海棠傷雨玉欄干。彈罷清琴夜欲殘。一醉忘他浮世事。重衾夢穩不知寒。

病中和大須賀六軒見寄

丈夫爭耐負清時。共賦竹枝何日期。執筆先驚銷氣力。一篇賦得唱酬詩。

遊巖島

扁舟一葉伴閒鷗。忽見迴廊水上浮。極且烟波光激灑。自疑身是入瀛洲。

和高山樗陰見寄

落魄猶甘環堵空。不知何日伸雙膝。空收萬里掣鯨鋒。半夜寒燈鈔杜律。

讀書

嚴風侵白屋。寒月照丹心。獨坐書窓下。興亡感轉深。

千葉街失火

紅焰衝天萬丈光。黑煙捲地勢如狂。祝融一奪繁華去。唯有群生泣路傍。

長胤寺觀梅

一簇香雲滿樹花。春光已到梵王家。徘徊不覺天將暮。月上梢頭照影斜。

戊子三月一日自浪華還船過遠州洋夜半風雨  
至有作

海氣冥濛望不分。艦頭人去語無聞。千山壞倒千層浪。萬嶽連成萬丈雲。鵬翼搏空風颯颯。鯨鱗捲水雨紛紛。船心賴有機關在。行路險艱何足云。

巳亥五月初一發東京至千葉途上偶感

春盡海東風色新。梨花芳草欲嬌人。苦吟半日無成句。看過青山白水濱。

題群駒遊戲圖

群遊得得戲春隄。狼籍落花飛委泥。晝裏無非千里駿。風雲何日試霜蹄。

巳亥八月訪中村吞舟

柳外清風夕日斜。江村來訪故人家。相逢一笑先呼酒。意氣何論鬢有華。

庚子元旦

椒酒三杯豪氣伸。便忘既往幾酸辛。多年落魄甘零碎。自謂太平無事民。

大須賀六軒見示新年詩次韻却寄

年華始改入清晨。早起身遙拜紫宸。弱柳飛鴉添興好。老松鳴鶴入題新。(新年御題曰松上鶴因及)金鞍映日丹霞下。玉輦連霞碧水

濱聽取四隣歌頌遍。昇平氣象醉黎民。家家松竹映新晴。  
旭影當軒瑞滿城。椒酒半樽酣醉足。糝羹三枕逸情清。讀  
書唯喜生前課。著述何關身後評。請看東風尤著意。早梅  
已有一枝橫。

富士山日出圖

庚子一月久平會席上課題

宿雲飛散聳銀峯。傍見群山翠黛濃。帶得扶桑紅旭影。千  
秋不改玉芙蓉。

和存軒渡邊操氏見寄

庚子一月廿四日

光陰猝猝入新年。傲骨有誰憐。瓦全堪羨風流文墨客。都  
城遠處弄雲烟。

疊韻似六軒詞兄

一道瑞霞天欲晨。雲車絡繹向楓宸。門投華翰儀依舊。軒  
揭旗章典做新。既見良籌決臺閣。未聞邊檄警瀛濱。琴書  
無恙還迎歲。猶有餘恩容逸民。

曙色蒼蒼嶽雪晴。韶光今日入皇城。窓前楊柳生烟麗。瓶  
裏梅花綴玉清。騷客唱酬多警語。同人應答少閒評。昌平  
有象休看過。一道江流畫舸橫。

送巖谷小波游獨乙

紅葉館席上

文章自在夙成家。又向歐西欲育花。想見紅毛綠疋子。爭  
圍膝下喚爺爺。

庚子十月久平會席上賦瀧野川觀楓

吟步尋秋古寺邊。蕭條落木夕陽天。兩三茅店客沾醉。霜

後林楓紅一川

和伊東晨亭見寄 庚子十一月十六日

清狂自遣亦堪憐。一榻茶煙好學禪。遙聽天邊孤雁叫。半宵風嘯擁衾眠。

謝某政客勸誘 庚子二月二十四日

利走名奔逐日新。肯移頑鈍舊精神。強顏未忍求餘肉。窮境何爲做世人。

庚子三月念九汽車中次遠山詞兄見似詩韻

述懷

平生客氣猶難除。放浪多年食絕魚。自笑疎狂隨筆舌。風塵幾日負琴書。

成東驛別遠山詞兄將省鄉里又用見似詩韻

賦贈

百年難免是辛艱。世事浮雲我不關。只恨別離人已去。車窓空望故鄉山。

辛丑新年書懷

疎狂我亦太平民。滿室圖書不覺貧。獨坐悠悠無一事。風塵堆裏絕風塵。

辛丑四月題江木冷灰居士待我歸軒

對室幽篁庇蕙蘭。繞池蒼玉綠檀欒。片雲停影花三樹。滿池清陰竹數竿。時把健毫題柱壁。又傾芳酒倚欄干。雄才豈啻刑名學。吟咏將攀李杜壇。

辛丑六月某日發鳴子至鬼首途上

曉來攀九折。始達高峯巔。山深雲聚散。路險馬迤邐。六月  
藤花發。殘鶯和早蟬。怪巖壓頭聳。危橋又慄然。松琴終日  
奏。飛瀑百尺懸。杜鵑啼足下。嵐氣掠髮邊。渴飲溪中水。一  
掬徹丹田。顧羨樵牧子。食足藉草眠。吁吾空慨世。何處身  
安全。世間知己少。好去伴神仙。

弔高旗城趾（里人云安倍貞任城趾）

高旗城古起悲風。數世豪華一夢中。烟雨濛濛山畔路。杜  
鵑聲裡弔英雄。

宿轟溫泉

探奇來宿白雲間。地沸溫泉境自閒。欲語烟霞人缺舌。嗒

然抱膝對青山。

題漁翁圖

江天雨霽夕陽紅。舟在蘆花淺水中。不識人間名利事。短  
蓑輕笠對秋風。

辛丑九月八日雨中作

不耐紛紛世路難。江山何處託身安。案頭半日倦鉛槧。落  
葉當軒秋雨寒。

癸卯二月一日房州上那古山囑目

悽然覽古倚崔嵬。九世雄圖已作灰。渺渺山河斜日裏。漁  
舟三五截波回。

觀音堂背有和泉式部母子之墓。雖無古記可徵。

此地爲坂東第三十三觀世音名蹟風景絕佳或收遺骨於此賦小詩以紀焉

由來詞客厭繁華。况復嬌情賴佛家。那古山頭瘞香骨。千秋風月對菱花。(菱花鏡異名此地對鏡浦)

千葉途上謁秦山伯得聽其活歷談頗有足誘掖後進者感激之餘賦以乞正

高談奕奕見誠真。恰似明珠不點塵。畢竟權謀無用耳。回天事業一精神。

松堂廣岡宇一郎舉男兒命曰人徵詩歌乃賦贈喜見家門慶福新。弄璋還是表天真。命名誰復言奇異。期待人間第一人。

春夜鹿野山中作

高樓宴罷夜將分。斷續吟聲隔谷聞。九十九谿春漠漠。一輪孤月半林雲。

戊戌九月十一日樂賓館即事

絃歌興盡客西東。日落紅雲暮靄中。猶有清談人五六。更傾殘酒坐秋風。

代南山和樗陰所寄離別詩韻

同人相會見情多。臨別高吟折柳歌。從是南方三百里。秋深東海幾山河。

小飲席上和六軒大須賀兄韻

盛衰利鈍本來空。世上漫評雌與雄。往事茫茫何足問。微

醺笑對落花風。

又

龍爭虎鬪跡皆空。今日逢君談自雄。尤喜花前同對酒。居然贏得古賢風。

辛丑十二月三十日和石田湖南見寄

清貧吟咏意悠然。豪宕文章擬孟堅。浮世窮通吾不管。陳編堆裏餞流年。

同和伊東陽谷見寄

名姓豈期青史傳。由來厭俗未求仙。自嗤狂態爲何事。齷齪風塵又一年。

偶感

東瀛之水風濤起。白日無光亂雲峙。河海飄蕩船挫舵。巖崎嶇車失軌。舟師不習迷港津。駑馬無力空鞭箠。茅蘆有人坐長嘯。靜觀天道非耶是。胸中素存經綸策。世上臧否付逝水。當年孟軻遂不遇。今日賈誼誰相似。君不見富峯千秋雪皚皚。終古不改八朶美。顯晦只任來去雲。居然鎮國亦偉矣。雖則偉矣時暝濛。仰觀誰能辨朱紫。不如從容且自娛。由來人情薄於紙。

乙巳一月入戰線有感呈大山元師

山河滿目塞雲凝。鬪線身投第幾層。躍馬陣頭霜似雪。驅車沙上月如水。砲聲霹靂電雷震。劍影熒煌龍虎騰。想得將軍神策在。從容笑待隙堪乘。



戊申五月總選舉後書感

中原逐鹿幾辛艱。露宿風奔數日間。百戰功成多意氣。征衣綠滴故鄉山。

二

跋涉青山白水涯。歸來驚見鬢絲加。吾生剩得舌三寸。猶擬丹心報國家。

己酉暮秋北越客中

斜陽一路客愁催。杖屨閒過野水隈。驚殺早寒俄沁骨。秋風颯度敗荷來。

謁春畝公柩己酉十一月四日

余近日綴東亞策一篇未遑呈而公逝矣末句故

及

泣弔英魂哀譜中。時看愁雨伴悽風。滿洲雲霧明星墜。故國山河皎月空。孤弱蒼生悲倒柱。列強王使拜靈宮。如君遠略無儔匹。已矣憑誰策極東。

庚戌五月余將遊於海外諸君開祖宴席上書感  
二首

櫻花委地促離愁。更把萍蹤話昔遊。五十未除飛躍態。載將書劍向歐洲。  
心期報國奈祖才。萬里行程夢裡回。落落男兒存意氣。放懷須酌別離杯。

觀瑞西山水有感

朝發羅馬向瑞西。夕入江山畫圖裏。多少輕舟點點驅。遠近翠螺重疊峙。鐵路輪船任意乘。涉湖回川幾百里。時酌美酒醉高樓。又趁佳景尋古寺。旭日出林望萬千。白雪濃粧水爲鏡。纖月掠峯景更新。青衣碧髻帶嬌起。處女嶽是長不老。定知此中住仙子。車道如棧凌雲斜。長橋橫江霓虹似。蓬島聞在東瀛濱。何料如今存西陲。爲說吾曹驕傲兒。眠若不覺嫌鞭箠。

庚戌五月剃去長髯藏之自題其囊

美髯名久世間傳。伴我辛酸廿七年。今日刈除何忍棄。錦囊納得自相憐。

庚戌五月十九日探姑蘇城勝

風流千載跡迢迢。張氏詩篇久詠謠。日暮低回感何限。寒山寺畔古楓橋。

二十三日和小川射山香港卽事韻

繫船香港口。徑上羊腸嶺。島嶼如綦布。山海望茫然。棧橫靜波上。樓聳懸崖邊。人種白黃雜。屋守高低連。星光耀九陌。月明照萬船。泰西贏文化。極東握商權。聖人不復至。禹域委他憐。恢復豈無策。慷慨案圖眠。

六月三日彼南所見

花葉無凋落。繁榮任自然。不圖炎熱地。大瀑下山巔。

六月十日觀釋迦講法遺跡

聖蹤何事委煩譁。古刹門連賣酒家。聞說天花飄講座。如

今只見雨斜斜。

六月十五日船中

白沫壓舷飛似煙。狂風揚浪浪掀船。此中領得雄豪氣。睥睨西南萬里天。

辛亥八月浴加州山中溫泉

重疊山中別有天。征衣脫去浴溫泉。忘他無限人間事。高臥優游學懶仙。

壬子三月移居於山城街大岡邸階上李鴻章所

筆硯海書屋之匾額乃賦

豈擬名聲滿議場。鳩居鵲巢獨揚揚。猶留硯海書堂字。月夕花晨醉墨香。

和佐藤山外見真大師六百五十回忌辰詩韻

欲憑他力濟斯民。露宿風奔酸又辛。功德萬千遙閱歲。寒喧六百更重春。繁多數旨寧傳偽。簡潔宗規却撫真。請看東方君子國。再生末法佛陀身。

壬子九月十三日奉梓宮自宮城至青山

泣奉梓宮從錦旌。愁雲蔽月夜三更。兩斑衆庶只嗚咽。萬籟無聲秋滿城。

癸丑四月十六日觀仙臺躑躅丘垂枝櫻

千枝萬朵艷花開。芳草岡邊暖雪堆。解得先賢命名意。真成此處是仙臺。

外山義達翁性好銃獵。年來所使用彈丸廢被成

堆欲以鑄造觀世音像一軀。使多年所殺獲禽獸  
 得佛果。且祈將來田菟益多也。今茲卜癸丑五月  
 初三開紀念會於墨隄。乞余紀其事。余曾屢受翁  
 獵獲之惠。不可不分其責。乃執筆錄概係以小詩  
 多年携銃涉山河。今日因緣祭佛陀。何事慇懃祈禱處。心  
 中却思獵禽多。

和硯海詞宗送塚原夢舟之中華民國詩韻

船入烟波裡。人登渤海涯。隣邦求益急。定是播文華。

甲寅七月有事。入東奧。過勿來關。曾與伊東暘谷

子上關趾。賦詩述懷。回顧既十星霜矣。

江湖何日得清閑。轉覺風塵鬢髮斑。滿目山河渾似舊。十

年重過勿來關。

賀恒松隆慶君華甲

老松賢節操。挺立在山陰。千古蒼蒼色。不容霜雪侵。

次江木冷灰所寄感懷詩韻反寄

秋天爽氣滿京城。慷慨向誰語此情。熱血洒來經國策。紛  
 成蛙叫又蟬聲。

再次江木冷灰題自畫蛙圖詩韻

十萬精英對垓城。休遺宏遠失真情。到頭征戰何贏得。沙  
 上頻聞偶語聲。

乙卯五月被訴迫自嘲

勇擬仲由貧似回。詩書錢債共成堆。看來世事皆堪笑。我

罪人言在贈財。

乙卯六月坐事投獄獄中無筆墨詩歌俳句等概

遺忘今錄一二

世上浮雲卷復舒窮通有命果何如。不圖今入閒生活。耽讀平常未見書。

八月自東京監獄徙高松監獄

曾冒炎威入讚州。西風落木忽驚秋。團欒一夜家鄉夢。覺破回頭奈楚囚。

獄中口占

世途多失脚。自顧笑疎狂。室暗夕陰早。身閒秋夜長。夢回雲閣上。憂到露歐疆。時事無由聽。沈思轉斷腸。

石田湖南寄書於獄中次余詩韻却求和乃疊前

韻

獺祭簡編空展舒。朝昏默坐悟真如。無心獄吏傳何物。喜見人間一片書。

獄中偶感

防備東方素必須。深歎朋黨後邦圖。勵精偏欲副民望。辛苦聊期扶廟謨。一意當年忘謫劣。再思今日悔狂愚。由來政弊每爲累。好爲廓清供此軀。

丙辰新年試筆

滿目蕭條裡。籬邊見早梅。東風猶博愛。窮巷送春來。

和石田湖南見寄韻

雪虐霜殘志未摧。歲寒須識有春回。陰晴不管天邊月。一任浮雲去又來。

丙辰四月十二日拂曉游東台

初日熹微照石壇。山櫻半發已堪觀。幽人散步東台畔。花下春風和露寒。

和石田湖南疊韻

戶外紅塵飛似灰。清明時節背花回。茅簷盡日無人到。只見雙雙新燕來。

丙辰五月二十一日登屋島談古嶺

八百星霜夢一場。由來成敗本無常。杜鵑啼過夕陽裏。談古嶺頭牽感長。

和井上活泉見寄

頑鈍天成不可遷。如今入道世間傳。蒼顏白髮成何事。處世悠悠卅七年。

次奧村正雄辭世詩韻併弔正人詞兄

人逝西風落葉秋。天乎命也怨無由。高才自古多如是。顏賈迎君白玉樓。

海邊松

老松臨海抗風濤。蒼翠千秋意氣豪。挫折幾回霜雪裏。枝頭更捧旭曦高。

遊北海道登別溫泉即事

蝸步上山山吐煙。羊腸下谷谷鳴泉。危峯千尺勢如削。這

裡徘徊身欲仙。

板倉公平君一周年祭 大正戊午十二月初七

欲向祭壇呈短篇。新愁入筆轉蕭然。無情世態驚奔電。花月風霜又一年。

朝晴雪

蚤起鉤簾積雪中。多時敲句對寒風。山河一白無涯際。海角天時旭日紅。

戊午歲晚書懷

寒燈光欲燼。悄坐續殘編。窮境猶安命。淡懷唯樂天。風雲邦運改。冷暖世情遷。百事從他笑。孤吟又送年。

田家早梅

雪後寒梅動我心。已看瓊玉出疎林。一枝春色村園裏。不許風塵半點侵。

答板倉龜水疊韻

田園日暖促梅心。認得橫斜月下林。一脉清香浮動處。任他老樹綠苔侵。

和武市蒼軒見寄

曾看勢望耀天邊。時局旋回奈晚年。陋卷枉收經世手。高吟笑傲亦堪憐。

題香取鄉文墨士五十有餘名紀事

滿目爛然雲漢章。文華相繼哲人鄉。香山高處花千朵。萬古流芳刀水長。

庚申四月四日次武市蒼軒見寄韻

節過清明花發難。怪看平地起波瀾。深泥門巷連旬雨。空  
憶吟鸞獨浩歎。

蒼軒再步前韻見寄乃疊韻却寄 庚申四月四日

中宵大息濟時難。巨手誰回既倒瀾。花蕾欲開春雨冷。陰  
陽變態又堪歎。

同十三日櫻花正盛蒼軒又有所寄乃步其韻時

蒼軒臥病

花柳陰中擁綠罇。笑他舉世利名奔。生憎二豎今爲厄。困  
臥床頭卷帙繙。

故友峰信一寄詩即次韻 庚申九月十一日

娛懷自在簿書中。數理文章誰競雄。羨殺仙寰忘歲月。培  
英化俗古人同。

庚申十月廿五日鹽原觀紅葉

白雲深處試清游。遠近丹楓萬壑秋。夜宿山中神愈淨。涓  
涓水遶石床流。

宿鹽原楓川樓

遠探勝景浴溫泉。紅葉青山秋色妍。一洗平生塵俗念。溪  
樓終夜枕流眠。

至鹽湯溫泉宿玉家五層樓

鹽原南去暮雲中。極目溪山一抹紅。素瀑下厓飄白雪。青  
松抱石雜丹楓。仙人已有營仙窟。

樓前山腹有稱仙人窟者  
此處紅葉最美



酒容寧無倒酒筒。所携丹壑以此夕全歸萬壑秋寒明月夜。高樓未寢嘯天風。

鹽原畑下戶清琴樓尾崎紅葉曾草金色夜叉處勝地尋紅葉。故人亡幾年。不堪今昔感。悄立夕陽前。

又

清琴樓上憶曾游。死後文名鳴五洲。來弔遺蹤人不見。滿溪紅葉水空流。

上妙義山 庚申十一月

窅然金洞竝金鷄。紅葉峯巒千仞谿。紅葉林頭秋絢爛。白雲巖角晚低迷。欲尋隱逸捉繩索。擬學飛仙攀鐵梯。勝景滿前看不盡。詩成石壁掃苔題。

庚申十一月二十一日高尾看楓

出郭郊原闊。鸞輪轆轤過。挾筇攀犖确。縋石度嵯峨。紅葉交杉檜。朱欄帶薜蘿。八州蒼莽裏。弔古感偏多。

辛酉八月游千島途上經石狩入十勝夜遂出太平洋濱

鸞輪過嶺氣清澄。夜色橫空露欲凝。忘却都門炎熱苦。太平洋上月如水。

根室港邂逅小林栗村栗村佐原人在千島既十有六年以漁業成家云

根室灣頭割碧鱗。征袵洗盡帝城塵。休言邊地稀知己。天上高懸月一輪。

游千島旬日立馬於登滿里山頭遙望西比利亞

天口號

書劍飄零向海東。經過激浪怒濤中。猶餘萬里英豪氣。吞吐茫茫鞞鞞風。

答人問近狀

疎放不關窮與通。人間百事信天公。虛簷樹少夜觀月。荒砌草深秋聽蟲。奇策于今多不用。讜言自古奈無功。老來漸脫紛華累。適意優游詩酒中。

明治己酉五月自木更津至千葉途上

薰風吹動紫藤枝。桑綠麥黃初夏時。自笑匆忙猶客旅。輕車半日雨如絲。

戊申季春游上州太田街城見館新田氏古墟余

亦出於新田氏末句故及

敢以微軀冒世艱。飄零又入兩毛間。落花風裏感何限。雨暗祖宗埋骨山。

過勿來關趾

青松點綴白沙間。無復落花紅爛斑。鐵路委蛇通海角。征人空唱勿來關。

旭光照波

曆入新年瑞色開。旭光當海絕紛埃。乾坤一碧茫洋裏。只見閒鷗去又來。

幽居 壬戌三月

三間茅屋翠微中。無復紅塵澆此躬。黃鳥去遷喬木後。幽溪一道亦春風。

謝石田湖南贈鯉魚

潛伏多年鮒鯽群。猶期一躍上龍門。故人贈我果何意。三十六鱗衝水翻。

展大井馬城先生墓

文章早已達天關。雄志晚年歎觸藩。何耐夕陽霜葉下。蕭條孤影弔英魂。

大正十二年十二月拜先帝遺愛書於明治神宮。中有佛國政典。是實先生壯年所譯述也。第一句故及。又曰余展墓之日。聞恰故原敬氏一週年。

祭集者如雲。而先生墓前則余一人耳。秋風落日。孤影蕭然。豈得不爲憮然耶。壬戌十一月四日中揮淚識。

壬戌陰曆十月望思蘇長公賦

星霜十四重。壬戌猶見策論新。銳鋒詩賦當年無匹敵。文章百代拓心胸。少壯謾欲攀虬豹。駑鈍爭能冒虎龍。今夜月明還有客。把杯聊擬故人蹤。

綠陰讀書

老來遺世世遺予。自笑功名念已虛。一榻清風眠始覺。綠陰深處讀仙書。

其二

五月薰風雨霽時。萬蒲出水綠方滋。幽人竟日閒無事。林下移床讀楚辭。

觀蓮

殘月光沈野水涯。早興曳杖訪僧家。斷橋孤塔曉烟散。映眼幾多紅藕花。

癸亥八月次伊東陽谷見寄韻

不勝炎威烈。高眠避俗塵。風蓮翻碧玉。晴竹調清筠。久絕談論友。頻迎道術賓。琴書消日課。白眼看時人。

送關口子赴任仙臺

春風一夜酌離杯。已見百花飛委苔。世事浮雲何足道。明朝稅駕是仙臺。

癸亥九月一日東京大震火災書感

皇天下警綺羅叢。忽見豪華歸一空。極目渺茫無限感。東台日暮立悲風。

疊韻

大震餘威驅祝融。繁華倏忽夢如空。彼蒼應有存懲戒。忍看兒童泣夜風。

次大八木文村弔平野後樂七回忌詩韻

大正癸亥十一月五日

西風落木有餘哀。只見天邊候雁來。君逝七年真一夢。墓前紅葉夕陽開。

輓河野岩五郎君

來弔故人棲隱邊。秋風寂莫好林泉。英魂一去呼難返。空

捧黃花哭柩前。

新年言志

神明降禍意無涯。從此民心戒侈奢。衰朽猶重迎甲子。更鞭駑鈍報邦家。

對落花

陰雲送雨暗西東。天地春殘寒不窮。舉國茫茫猶醉夢。悵然獨對落花風。

栽竹

曾聞龍種誘栖鸞。移得淇園竹數竿。柳暗池邊青錯落。花明庭際綠團圓。琅玕帶雨垂簷濕。翡翠銜風舞袖寒。手灑清泉情不淺。慇懃更囑報平安。

又

數竿脩竹傍軒栽。葉葉枝枝翠作堆。一夜薰風吹鳳尾。和將細雨打窓來。

星享氏廿四回忌辰賦奠

大正十三年六月廿一日

黯黮風雲蔽海天。時艱誰不憶先賢。星霜廿四真如夢。空捧香華哭墓前。

次山本二峯(悌二郎)韻

昨夜蛟龍卷雨來。風雲一擊落蒼苔。幽潛豈久池中物。本是天門騰躍才。

栽竹

讀餘閒課在庭上。且盤桓。帶得苔多少。栽來竹若干。微風

吹鳳尾。細雨灑龍竿。時結瀟湘夢。清陰夏亦寒。

江岸寺老松

以杜少陵風雨時時龍一吟之句爲韻

池畔翠陰遍。蒼龍騰碧空。澄潭涵素月。古砌起清風。千尺老松聳。垂枝如鶴舞。有人來學禪。半夜聞風雨。同人相會處。讀書又評詩。燈下忘深夜。清談耳熱時。鬱鬱蒼松下。清幽有小池。龍吟風靜夜。魚躍月明時。松下時相會。詞章各競雄。半宵風雨至。軒外躍蒼龍。玄談欲徹宵。細雨聲蕭瑟。林下各題詩。何人推第一。高咏人多少。談論空古今。忽聽禪閣畔。乘雨一龍吟。

熱塩溫泉雜吟

聞說玄翁拓嶮難。吾來尋路涉奔湍。芒鞋幾度攀丹壑。竹

枝隨時降翠巒。押切川邊風冷冷。撞平山上月團團。浴餘又喚三杯酒。醉倚高樓亞字欄。

同(示現寺)

靈地翛然物外情。林深寺古自幽清。佛恩示現常圓滿。涌出溫泉浴衆生。

同

積翠埋谿一路斜。溫泉烟罩兩三家。何妨隣屋俚謠鬧。愛見床頭百合花。

同

新詩隨口就。巧拙又何關。脫却浮生累。看雲意自閒。

同

鐘聲知日暮。月影覺更深。浴後閒無事。新詩信口吟。

同

夜深人語絕。明月在蒼穹。馳思乾坤外。豪懷一世空。

展玄翁和尚墓

傳云玄翁嘗摧殺生石救世人故及

雄僧此埋骨。片石帶苔濃。世上多茶毒。教人慕舊蹤。

過白河關趾

炎熱襲身如外患。飛塵打面似時艱。亂蟬聲裏秋初動。滿

眼風雲度古關。

蘇東坡

分韻得邦

蘇公文筆似奔瀧。氣力雄豪鼎可扛。私淑多年何所學。殷憂只是繫家邦。

晚酌

處世由來分轆軻。嗒然憑几睨風波。牀頭若缺一瓶酒。滿眼黃塵奈我何。

次平野順天子蓬島偶成韻

隱栖孤島畔。高臥足安躬。夜見波閒月。秋聞草際蟲。不關當世事。猶慕古人風。景物無邊好。吟權屬此翁。

謝本橋君見贈松蕈

江山風月興偏見。獨對青樽入醉鄉。晚際占他秋氣味。一籃松蕈十分香。

山色連天

早起登樓坐令辰。眼前天地自清新。雲山一抹青如黛。帶

得初曦接九旻。

又

百尺高樓上。端然拜帝宸。歲華從此改。曉色自然新。雲散  
總州嶺。波平袖浦濱。芙蓉千古色。皎皎聳蒼旻。

次皆川君除夕韻却寄

老境何堪屈此腰。猶存狂態擬農樵。一年將暮人奔走。只  
喜幽居遠市囂。

寄水野香堂在大磯次其山色連天詩韻

海鄉冬暖似春天。日照梅花影亦妍。起望遙空雲外色。群  
山擁雪入新年。

喜小川射山入臺閣賦寄

喜見廟廊新擢賢。江湖翹望既多年。誰言後進凌先進。冒

雪梅花本自然。

聞或雖射山超野田岡崎等  
先覺入臺閣三四故及

春郊散步

林間啼鳥弄春喧。山雪初融野水渾。又被東風促吟杖。訪  
花尋柳遍江村。

詠牛

耕耘未必厭衰躬。服業田園萬頃中。放牧桃林何足羨。晴  
郊芳草臥春風。

初夏偶感

溪山深處有人家。新綠埋村一路斜。遙指林端拖杖去。殘  
櫻猶見兩三花。



躑躅花

節逢初夏日方長。躑躅花開滿野塘。更有一林松樹色。青紅相間媚斜陽。  
歲月蹉跎霜鬢加。老看時事更歎嗟。滿腔熱血澆無處。染作千叢躑躅花。

初夏所見

炎氣侵人自鬱陶。薰風送雨雨如膏。他時想得凌雲勢。新筍參差拔樹高。

插秧

山雲催雨送輕雷。水足村村夏景開。喜見新秧青數寸。昨因農婦植將來。

次堀內靜字將遊九州留別詩韻三首

故人曾在北肥州。書劍相携更再遊。豪氣忠誠兼得好。孔門求匹是唯由。  
弊政多年憂患深。男兒何暇慕山林。載將筆硯西州去。老境猶存報國心。  
卅年湖海友情深。唱和同遊翰墨林。休道滿頭多白髮。依然文字見雄心。

聽蟲

獨坐思詩月正明。新秋爽氣滿江城。酒醒衣薄西風冷。聽盡階前促織聲。

鴻臺懷古

九世雄威震二州。鴻臺一敗事悠悠。龍蟠虎踞今何在。猶有江流帶古愁。

落葉

寂寞山莊少客過。村醪一醉意如何。忽疑寒雨隨風至。半夜軒頭落葉多。

初冬夜坐

茅簷無客月空明。霜氣連天冷滿城。獨對陳編過半夜。遙聞警柝兩三聲。

曝背

頭番風信上梅花。春到江南野客家。鶴夢醒時猶日午。茅簷曝背讀南華。

寄古劍遺懷

論陳督兵侵敵營。文壇立馬守孤城。時平往事都如夢。猶有蒼龍匣裏鳴。

河水清

歲改西隣未息兵。偏欣日域正昇平。滔滔千里黃河水。孰似東寧終古清。

探梅

杖屨尋春野水隈。追晴半日不知回。荒村亦有昇平象。處處人家見早梅。

又

探梅郊外命巾車。野水迢迢一路斜。此日風烟憐澹蕩。平

生城市厭繁華。鐘聲遠度雲中寺。帘影輕翻竹外家。微月  
黃昏天地淨。枝頭點點綴瓊葩。

詠史(信長)

拔擢英才卓隸中。尾陽風雨滅英雄。當年一事解忠恕。四  
海長推撥亂功。

又(氏鄉)

當年文武拔群雄。英發才華却禍躬。大志不酬遺詠在。後  
人空誦落花風。

雪霽

城外幽居抱膝吟。老來消盡利名心。春初却訝餘寒烈。夜  
半俄驚積雪深。咫尺窓前堆玉樹。參差樓外列瓊岑。天公

賜我清新景。起把殘樽手自斟。

其二

一碧天晴雪始收。枯楊影外認前洲。料知蠶婦晨炊飯。河  
口烟颺夜泊舟。

題林和靖觀梅圖

烏巾白髮立看梅。側有兒童伴鶴回。月出孤山流水畔。橫  
斜涵影一枝開。

春山讀書

芳草青青宿雨餘。春山花發世塵疎。石床手拂青苔坐。靜  
讀黃庭一卷書。

新燕

香泥銜得入簾幃。柳外雙雙掠地飛。終日呢喃似相慰。江  
山南里趁春歸。

題金華石（青厓先生所藏）

金華石見鬼神鑄。移得名山置机邊。太似先生詩格壯。五  
峰帶雪聳青天。

次若槻相公周甲詩韻

坐斷中堂局面開。使君有算獨含咍。謹嚴欲學師山縣。豪  
放不追侯大隈。隱酒坦懷藏利器。題詩健筆寓宏才。桂公  
藤伯疎文事。論到風流足鈍駘。  
廟廊今見古賢風。燮理陰陽起蟄蟲。利弊所岐三致意。折  
衝自任一披衷。偏期人傑華盛頓。豈慕梟雄拿破翁。夙有

蓄胸經國策。登壇吐辯氣如虹。

平素溫容親幼童。豪懷何遽自稱翁。堂堂大度群黎賴。落  
落雄心一世空。舞鳳欲來春樹上。飛龍已躍景雲中。勿忘  
君子在田意。野處朝班兩是同。

壽國分青厓先生古稀

經國雄懷壓古人。吟壇今日筆超倫。壯時曾講刑名學。頭  
白耽詩七十春。

春草

新晴來訪野橋東。斷靄平蕪帶軟風。一望池塘春似繡。青  
氈布遍夕陽中。

壽克堂首相華甲

公餘詩酒事風流。華甲正看恩寵優。一代經倫卑管晏。百年輔弼慕伊周。由來大巧卻如拙。應識制剛唯在柔。天下期君誠報國。勿分民庶與公侯。

讀屈原傳

當時楚國亂於麻。無復君王辨正邪。邈矣興亡二千歲。如今猶欲賦懷沙。

杜鵑

絲絲垂柳綠烟低。躑躅花開紅滿隄。欲趁薰風試行樂。溪山帶雨杜鵑啼。

賀中村國手舉男兒初遇端陽佳節乃賦呈

薰風放霽遇端陽。家湧歡聲傳弄璋。畫出龍門騰躍勢。鯉

魚振尾旆飄颻。

題李白觀瀑圖

豪懷本是詩中仙。探勝攀到匡廬巔。遙見白虹橫峭壁。藻思鬱勃如湧泉。吟賞多時不能去。觀瀑逸興至今傳。青蓮詩賦壓百代。山色泉聲壯足配。長條一幅畫者誰。峰巒遠近雲巖巖。我欲裁詩徒苦心。悠然撚髯獨相對。

同

飛沫如煙白日霾。玉龍奔躍下懸厓。雷轟電擊三千丈。不怪詩仙託壯懷。

盆魚

盆裏託生心自安。藻間求餌起微瀾。浮沈盡日優游足。敢

慕汪洋萬里寬。

登嶽

萬仞芙蓉頂。高歌意快哉。草鞋攀險峻。棍杖度崔嵬。山海  
眸中入。雲煙脚下開。天風吹浩浩。此處即蓬萊。

題背面美人圖

風拂金釵綠鬢斜。無言背面對憲紗。定知傾國嬋娟貌。恨  
殺浮雲蔽月華。

步克堂相公招飲席上見似瑤韻三首

公餘會客頌清時。幽邃園林接古祠。坐有華人須語譯。同  
文幸不覺侏離。  
忙裏猶催翰墨遊。雄懷雅趣拔時流。招筵本寓善隣誼。詩

酒何曾讓一頭。

相公愛客遠人來。官秩無分雅讌開。賓主盡歡多興趣。柏  
梁酬唱客忘回。

次蔗庵總督書感詩韻

白髮重任多寵榮。偏欣佩玉入蓬瀛。茫茫碧海芙蓉遠。浩  
浩蒼天斗柄橫。孤室調衣催感慨。單身顧影見衷誠。此心  
移得施仁政。四百萬人皆樂生。

送蔗庵總督赴任臺灣

天南重職喜新任。落落雄心不可侵。意氣由來感恩遇。精  
神畢竟報知音。閒中既貯經綸業。忙裏猶存愷悌心。聞說  
生民思革正。旋將德政解幽沈。

迎靜字堀內君自九州歸

久澗相逢詩酒筵。不嗟世事尙迤邐。記曾賦別黃梅節。回首星霜忽一年。

秋雨書懷

身迹蹉跎易斷腸。枉繙陳籍自潛藏。樓頭把酒聞蟲語。月下裁詩見雁行。萬壑秋闌風浙瀝。四隣人定家清涼。幽居此處應安命。世事浮雲未可量。

紫式部

五十四篇如綴瓊。女流誰復比才名。只今惟有石山月。一片清光千古明。

和蔗庵總督見寄詩韻

奉命治南國。住民要遂情。法猶存舊套。政既見新清。海島秋光浮。天涯瀨氣橫。善令仁德普。邊地亦文明。雄心未厭簿書堆。頭白猶期拓草萊。積水渺茫雲萬里。南疆重任荷恩來。

觀菊

東籬菊發又重陽。秋氣淒清露欲霜。縱有名園千種色。騷人只賞白將黃。

鎌倉懷古

從自源公去。風霜七百年。勳業半炊夢。豪華一炷煙。東關開霸府。西洛假君權。傷心荒草裏。古墓獨蕭然。

丙寅十月廿五日送青厓先生遊臺灣

臨別慙慙更屬杯。羨君乘鶴入蓬萊。新高山畔逢仙子。謝却棊枰請速回。

贈鵜澤兄 勘三郎

白頭相擁轉悽然。雄志無酬也可憐。猶見精神存國事。春桑爲伴廿餘年。春桑謂春峰桑軒

寄懷青厓先生在臺灣

南疆冬暖足盤遊。客裏何論忙唱酬。想見先生微醉夕。長髯飄白倚高樓。

海上風靜

旭日曠曠海上天。平波如席入新年。巨船行處東風靜。吐出青空一道煙。

冬暖

城外幽棲遠世譁。南軒曝背日方斜。冬天氣暖隕霜晚。猶見幾叢黃菊花。

海上風靜

早起樓頭坐曉風。滿城晴色望玲瓏。埋林白雪涵蒼海。列港黑煙冲碧空。帆影往來天水際。山容出沒景雲中。茫洋萬里平如鏡。照出曠曠旭日紅。

迎青厓先生還自臺灣有作

太白山人還自南。相逢傾聽客中談。風光最是推奇絕。阿里新高日月潭。

我抱雄圖如老何。羨聞萬里渡蒼波。觀風察俗談風發。驚



絕先生意氣多。

龍社迎君傾酒杯。主賓談笑興悠哉。五旬探討三臺勝。帶得滿囊珠玉回。

瓶梅

幽居盡日少人來。偏喜琴書絕點埃。日照南牕香馥郁。瓶中方發一枝梅。

題清女撥簾圖

宮掖群媛誰競賢。文章妙麗壓當年。珠簾朝撥前山雪。遙擬風流白樂天。

大正天皇輓詞

調元乾符解。海立又山飛。醫療方全盡。齋祈事既非。風寒

雁聲若雲暗。月光微。億兆哀無極。騎龍不復歸。

東台觀花

閒人無事獨徘徊。一般韶光興自催。杖履尋詩出西廓。簾瓢乘霽向東台。滿山烟靄聯雲曳。萬朵櫻花帶露開。傘影衣香春若海。逍遙半日醉忘回。

送友人之支那

分手高樓感慨中。征帆萬里背春風。西隣誰救兵才禍。鬱勃豪懷氣吐虹。殊域投身好試才。同人叙別大江隈。明朝海上雲千里。今夕樓頭酒百杯。月落長天歸雁去。花飛遠樹杜鵑哀。丈夫寧負蓬桑志。期得功名畫錦回。

夏景冲澹偶然作

雨餘新樹蔭柴扉。日午薰風雙燕飛。更見重重青綠裏。幾  
叢著得白薔薇。  
遲日園林靜寂中。層層樹影擺薰風。流鶯去後新鷓至。放  
出庭前躑躅花。

梅雨

密雲旬日未全晴。水足山田儘可料。時聽林端深綠裏。新  
蟬和雨兩三聲。  
陰晴不判熟梅時。何日迅雷開赫曦。水漲田疇無可辨。蛙  
鳴豈暇問官私。

和鶚軒土井君退官所感韻二首

曾聽泮宮拔班鷺。如今風月伴清閒。讀書吟咏平生課。時  
得銜杯對暮山。  
入微尋細更探源。救世應知學術尊。猶是白頭思報國。著  
書言志亦君恩。

消夏雜詠

三間茅屋枕清流。竹榻閒眠儘自由。山頂雲收明吐月。溪  
灣波靜穩維舟。微風消酒知深夜。爽氣侵衣疑晚秋。終歲  
逍遙吾事足。浮生未慕赤松游。

題不識庵擊機山圖

兩雄同世偶相逢。韜略齊爲百代宗。不耐干戈連歲結。短  
兵一擊走蟠龍。

觀瀑

溪頭坐石夏猶寒。素練穿雲瀉碧湍。珠躍虹飛難著筆。低  
徊半日且貪看。

題畫

雲山重疊鳥群飛。三五村家倚翠微。橋上老樵眉似雪。一  
肩擔得夕陽歸。

殘菊

幽閒定是隱人莊。老柳孤松三徑荒。獨有陶公采餘菊。一  
枝猶見傲嚴霜。

冬夜寄友

老來却喜背時流。檜拙爐邊坐擁裘。霜月在天風物淨。向

君欲問有詩不。

孤雁叫飛猶應候。百花凋落亦隨時。看來世事多乖意。何  
日同斟酒百卮。

歲晚書懷

白髮蒼顏徒自憐。燈殘漏盡更凄然。回頭往事皆如夢。夢  
裏生涯又一年。

新年書事

孤寒依舊臥蒿萊。憂國丹心老未灰。忽喜春風吹入座。故  
人遺我一枝梅。

畫龍

八十一鱗描寫全。風雲忽欲出深淵。雙睛未點知何意。偏

八二  
恐飛揚躍九天。

訪梅

籬落雪殘無點塵。清香一路導幽人。田家自有好生計。比戶植梅皆蓄春。

挽堀內靜宇

東都辭去向南肥。論戰三年筆有威。今日醉魂呼不醒。悠揚遠駕白雲歸。

新筍

四野無花春寂莫。滿園皆綠樹周遭。微風暖日茅簷外。新筍參差拔地高。

讀嚴子陵傳

八三  
弊衣蓬髮訪鷗盟。乍脫王冠一笑迎。休奏客星侵帝座。半床惟見故人橫。

詠史(德川西山公)

漾漾仙波湖水濱。滿園梅樹見精神。心存帝室宣王道。身在宗藩忘懿親。正史千年明大義。豐碑八字表忠臣。皇威復古由誰力。偉矣求仁此得仁。

遊玉川

行傍清流踏白沙。碧波如玉一條斜。夕陽晞網漁翁在。認得林間賣酒家。

七夕

牽牛今夜渡銀河。恨殺佳期風雨多。仰望層霄雲漠漠。不

知何處弄金梭。  
七夕漢宮開宴時。西來王母現仙姿。偷桃我恥東方朔。且  
奉穿針五彩絲。

曝書

驅蠹檐前曬午風。寥寥圖籍篋箱中。年來滿腹不平事。高  
臥何須學邾隆。

驚秋

氣候失常節。閒庭蟲語稠。遽然過盛夏。忽爾入新秋。慘雨  
傷人意。淒風惹客愁。題詩聊遣興。把酒欲消憂。影暗山頭  
月。燈明水上舟。夜涼河漢淡。四境自清幽。

落葉

負郭幽棲少客過。靜申恰好養殘痾。半宵眠覺秋蕭瑟。寒  
雨當軒落葉多。  
晴暉映楓樹。一路白雲隈。流水漾紅去。輕風飄綠回。橋頭  
時佇立。林下獨徘徊。如見天孫錦。新詞不易裁。

新霜

雲間雁叫識秋深。晴曉霜威徹枕衾。一路板橋人迹外。爛  
斑染出錦楓林。

拜登極大典恭賦

瑞氣洋洋滿九闈。吾皇此日御乾坤。歡聲萬歲轟丹闕。旭  
影三竿照紫垣。春興殿前神鏡耀。陽明門上鳳旛翻。微臣  
衰老逢照代。近拜天顏亦聖恩。

田家朝

登極儀成又近年。高臺應定望炊煙。鷄鳴狗吠昇平象。霜  
白寒郊萬頃田。

泉岳寺

取義成仁死不移。操持如鐵是男兒。青山四十七人墓。千  
載居然護國基。

消寒雜詠

禾穀接檐看歲豐。菅茅懸壁障寒風。都人不識山家富。自  
在鉤垂爐火紅。  
避寒淹滯豆東天。雪滿江山景物妍。散策逍遙終日課。歸  
來適意浴溫泉。

新鶯

東風送暖雨初晴。散步園林曉氣清。鼓吹詩腸何物足。老  
梅花外囀新鶯。

聞盜匿堀口長城邸贈賦

寒苦迫人間。世上多草竊。警吏急追窮。超牆投詩哲。主人  
雖寬仁。驅逐又峻烈。遁逃走隣街。冥鴻踪跡滅。朝暮頻嚴  
戒。遠近更震驚。說教擬慷慨。講談儘縱橫。盜兒太狡獪。捕  
拿功未成。願倩俊英手。疾速安民生。

桃源圖

一溪流水送落花。漁郎掉舟穿彩霞。行沿巖壁出洞口。驚  
見茅茨數十家。鷄犬相聞童孺戲。紅綠滿眼春色奢。人云

八八  
避秦入此地。民淳俗和富桑麻。星霜千百絕世信。不知漢代况魏晉。忽迎珍客比隣歎。煖酒炊飯頻問訊。淹留纍日又還鄉。猶期他日再遠趁。武陵刺史本好奇。欲憑漁郎尋津涯。浮舟溯谿苦探討。青山茫茫不可知。嗚呼仙寰之事傳世久。桃源由來無耶有。荒唐夢境何足歌。人世至樂在詩酒。

又

放舟溪水掉春暄。不用迷津尋洞門。詩酒優遊吾事足。人間到處即桃源。

菜花

春風一路舍輕車。雲雀聲聲穿彩霞。看取平和真樂境。菜

花叢裏兩三家。

又

菜花叢裏獨行吟。貽蕩風烟春已深。一望山村茅屋畔。滿畦無處不黃金。

蛙聲

山田雨足可耘耕。獨憶家園睡未成。聞說蛙聲隨地別。終宵閣閣爲誰鳴。驕鳴徹夜屋西東。彭腹張弦意氣雄。欲向月宮騰躍去。姑耽鼓吹在泥中。

訪真鳳上人病

和尚何爲氣不揚。無聊經月臥禪床。詩人不免煙霞疾。墨

客動成泉石狂。應有萬杯侵肺腑。休言二豎在膏肓。由來攝養重心境。振起精神復健康。

虞美人

細腰長伴拔山雄。垓下重圍感不窮。起舞猶酬平日寵。淒涼四面楚歌中。

虞美人草

淺紅清楚不留塵。何負佳名虞美人。曾侍英雄成敗際。豈圖瓶裏艷妝新。

喜夏

朝來一雨洗炎塵。緩步微吟野水濱。萬斛涼風無限富。一痕明月自然珍。幽琴清笛不妨古。樸履蕉衫偏喜新。簡素

營生夏尤好。玉壺在手欲忘貧。

答人問近况

七十生涯萬死餘。何須避毀又求譽。近來只有閒中課。朝對棋枰暮讀書。

弔宮井思堂

思堂名真。鳳江岸禪寺住職。昭和四年七月沒。

一喝偷兒愕。禪機和夢開。思堂曾醉臥中。一喝走盜兒。笑看經百卷。痛飲酒千杯。庭古蟲聲細。人亡鳥語哀。老松遺愛在。白露濕青苔。

新涼

雨餘涼氣入紫荊。已聽叢間促織聲。縱有殘炎侵醉骨。夜深梧竹自秋聲。

王昭君



昭君有子繼單于。遠嫁何須怨畫圖。若使肖形齊衆女。宮中未必受恩殊。

餞秋

烏兔怱怱似水流。西風落木又新愁。樓頭獨坐清宵月。薄酒干魚餞素秋。

題萬里長城圖

併合六雄寰宇安。長城萬里若龍蟠。何圖禍發蕭牆內。早使陳吳作亂端。

新寒

郭外冬來始。俄知酒力微。茶花含雨發。柳葉帶霜飛。看月開書幌。嫌風閉竹扉。晚來殊凜烈。呼火又重衣。

海邊巖

十丈層巖東海阿。風霜鏡骨勢嵯峨。休言孤影誰相伴。終古巉然厭大波。

富嶽旭日圖

東瀛巨鎮仰靈峯。傍見群山翠黛濃。紅旭瞳瞳輝積雪。千秋不改玉芙蓉。

春雪

料峭春寒向曉加。便看微雪點梅花。朝曦始照殘雲散。一角峰巒淺帶霞。

遊房州

名場利路復何求。癖在烟霞老不休。轆轤騰輪三十里。載

將春夢入房州。

寄若槻克堂奉使在倫敦

奉使英京萬里餘。丹心只在報邦家。一身今日與望大。休問新霜上鬢華。

送人遊芳野

聞君去向碧崔嵬。話別江樓把酒杯。四月芳山春尚冷。賞花吟就疾歸來。

次金子溪水天長節詩韻

朝起樓頭拜帝宸。韶光普遍及微臣。朗晴此日天長節。恰好桃櫻滿眼春。

步網陵德川侯爵帝都復興玉礎

歲月悠悠一瞬過。看來世事感懷多。高樓聳處曾焦土。哭泣聞邊今頌歌。

畫蘭

可愛超然塵外姿。伴篁把石數花披。參差配合傳神妙。濃淡分敷信手奇。高趣元宜君子佩。幽香又入雅人詩。忽生兩翼山翁夢。一夜飛遊湘水湄。

花葉交加短又長。淋漓墨色帶風霜。楚臣一去幾千載。猶有芬芬藏古香。

初夏江村

薰風暖日惹詩情。起步溪南幾里程。滿眼江山映新綠。林頭裂帛杜鵑聲。

雨霽西山夕照移。江天一色碧琉璃。參差影動靜波上。時有微風度柳絲。

詠芭蕉

窗外芭蕉在新陰。次第舒微風生几席。清露滴階除。葉動三間扇。芽抽一卷書。蔚然天地綠。長夏樂幽居。

二

月明階下青簾卷。雨霽軒頭綠旆翻。獨坐清陰憑几嘯。薰風滿地滌塵煩。

三

薰風五月雨晴初。移植蕉苗綠稍舒。仰向彼蒼如有訴。芳心一卷果何書。

題竹林七賢圖

一世英才稱七賢。檀欒日夜竹林邊。當時晉室如麻亂。何事論空又說玄。

黃老遺風入北胡。頻稱共產與虛無。如今曲學弘其說。也似林間七子徒。

次輿村梅村金婚自述韻 三首

鳴琴酌酒樂遐年。繞膝兒孫轉藹然。婚後星霜方五十。闔家歡笑入詩篇。

恩恩歲月達金婚。白髮夫妻醉綠樽。家室唱隨辛苦裏。養喪無憾亦皇恩。

伉儷相和少比倫。豪懷况又厭青春。風流韻事堪欽賞。詩

畫文章自在身。

秋蟬

秋深瀨氣滿園林。樹影當軒冷透襟。雨過茅簷少人到。斜陽影裏一蟬吟。

秋懷

短筇輕屐漫徘徊。或度丘陵或水隈。澤畔蕭蕭楊柳老。叢間落落野花開。每逢佳景揮詩筆。又把幽情付酒杯。日暮一痕弦月外。秋風更送雁聲來。

二

西風吹送遠砧聲。秋滿都門動客情。獨倚高樓過夜半。長天月白雁行橫。

掃落葉

天寒秋氣老。木葉自凋零。遠嶺影臨戶。朝暉光滿庭。重重埋澗路。簌簌沒林坳。童兒空煩悶。風前帶幾停。

送本田春城之北海道

都城厭煩劇。北海試沈潛。未遇春風惠。詎惟寒氣嚴。法曹傳敏腕。詞友慕長髯。僻境人敦樸。慣安休滯淹。

冬至感懷

南枝已見早梅萌。冬至今朝暗自驚。歲月如梭容易過。葭灰飛盡一陽生。

社頭雪

朝來積雪白皚然。玉樹瓊垣繞廟前。仰看明神威德著。新

正第一兆豐年。

題蘇武牧羊圖

孤身持節意昂然。若牧羝羊十九年。北海沙場風雪日。何期博譽漢王前。

紅梅

幽居春到興何如。一樹紅梅傍草蘆。綽約嬌容殊可愛。胭脂和雨濺階除。

二

清香何處襲人來。滿地惟見白雪堆。却喜深紅醒我目。一枝已綻向陽梅。

春夜聽雨

雲箋欲寫靜中情。兀坐幽窓句未成。聽得蕭蕭春雨裏。夜深隣室斂碁聲。

牆角紅桃花未開。春陰釀雨罩樓臺。幽人半夜情多少。琴筑聲聲入夢來。

辛未四月次若槻克堂就任口占之韻

敕起賢才再出山。應知黎庶脫辛艱。幾年鷗鷺卿中主。他日麒麟閣上班。前相病痾傷政界。新魁聲望壓人寰。聖明天子宸憂在。小大何爲付等閑。

聞湯目北水病起賦贈

老軀平日健。大病一朝平。妙術逢倉扁。深交比弟兄。神明惜純樸。天意愛廉貞。喜見桃花下。春風滿面生。

春晚

清明過幾日。風景惹吟身。飛燕時衝雨。流鶯似春惜。林塘  
花影簇。野岸漲痕新。遠近須行樂。寒暄正可人。

川上南洞翁七十壽

莫逆交情四十春。依然意氣白頭新。古稀何必稱高壽。物  
外乾坤自在身。

平清盛

廿載驕奢恃寵榮。遷都鑿海氣縱橫。勢威赫爍麾頽景。難  
奈自家天命傾。

謝人贈香魚

羨君終日脫塵忙。垂釣清遊水石鄉。多謝一籃時味賚。鮮

鱗潑刺帶苔香。

題首尾松材苴盆

墨涯松樹下。嘗繫冶郎船。此器存殘片。待賓佐嗜煙。

靜女

芳野別人空斷腸。鶴陵奏舞託歌章。腰支縱是纖於柳。操  
似貞松傲雪霜。

夏夜坐月

長松百尺繞溪流。謾謾聲沈夜色幽。獨坐銜杯對山月。滿  
身涼氣似清秋。

歸燕

雙燕營巢用意微。春來育子教翔飛。避寒追煖不辭遠。又

趁秋風相伴歸。

僧西行

一夕俄然失故人。緇衣遂作水雲身。浮生畢竟如春夢。笑擲銀貓比片塵。

十六島暮秋

偶趁秋晴艤小舟。欣然載酒度江流。蘆花一帶閒漁戶。白了湖南十六洲。

昭和七年壬申

御題 曉鷄聲

東瀛浪靜入新年。妖霧將開朔北天。且喜司晨鷄膺膊。一聲呼覺萬家眠。

寄人在滿洲

匪賊猖狂漫動兵。皇軍爲略奉天城。想君豪氣今如昔。寶劍一揮鳴有聲。

題書齋樂貧居

三杯薄酒勝聲起。一桶糟糠富有餘。詠月吟花應了命。樂貧居是樂天居。

昭和八年癸酉

御題 朝海

海水微明曉霧中。應知這裡動春風。西方天地雲猶暗。舉首扶桑旭日紅。

園田天籟君華甲壽詞

青年立志入京畿。醉筆題詩興欲飛。康壽已躋周甲域。猶  
欣鬢上二毛稀。

梅花

山園日煖杖藜尋。認得橫斜影一林。脈脈清香浮動裏。老  
松並見歲寒心。

函山

昔時行旅苦過關。今見樓臺隔俗寰。相豆海波周匝碧。芙  
蓉東麓是函山。

皇軍破敵入熱河

聞說北軍強者多。如今怪見弱兵加。長城超去富奇趣。踏  
破堅冰入熱河。

「春峯詩稿舉」

跋

明治十年春。予以事訪押日中村某於大多喜。留數日。有  
人通刺來見。某曰。此爲板倉中。我今延見。子在傍聽其談  
可也。須臾而其人來就座。齡二十左右。眉目秀明。言談極  
輕快。娓娓說青年教育之須要。予心異其爲人而記之。後  
千葉縣選縣會議員。果有君名。選衆議院議員。又有君名。  
後以爲例。予每見其名。回想當時不能忘也。四十一年本  
橋兵太郎寓予塾。兵太賴君之庇護在大學。是以數與君  
相見。得悉其平生。君上總關村人。家素饒於財。七世祖美  
仲。爲荻生徂來高足弟子。君弱冠通書史。開執中塾。教子  
弟。有年於此。籍于自由黨。與板垣伯大井憲太郎及予友



宮部襄親善。伯爲內務大臣。擬君以群馬縣知事。有故辭之。西南役已平。天下志士慨二三雄藩人專國政。民選議院論囂然而起。與當路扞格。罹刑辟觸法網者。前後相尋。君亦數逢屯阨。毅然不屈數十年。遂得達其志。而未幾頽然老且病矣。君自少喜賦詩。已病。探篋底獲三百餘篇。曰雖辭不成章。亦可以識吾志乎。乃校訂付梓。贈親故。俾予書其後。曾竊思創業之人。伐榛莽荆棘。手足胼胝。或顛仆就死繼之者。坐收前人之成業。駕安車策駟馬者。往往而然。予於是不能無疑於天之應報也。然此於君不過劔首一吷耳。豈足以累其心乎。唯予知君尤久。見其盛衰窮達之狀尤悉。故深感人生無聊賴。書所疑以爲跋云。

昭和壬申冬

安井朝康撰

春峯詩稿大尾

10.12

昭和九年十月五日印刷  
昭和九年十月十日發行

著者 板倉中

發行者 鹿島千太郎  
千葉市寒川九七九番地

印刷者 戸田鏡太郎  
東京市墨田區墨田一八三八番地

印刷所 村上印刷所  
東京市本郷區込田町一六九番地

發行所 執中館  
東京市荒川区西大久保一丁目四八番地

終

